

荆川先生文集

二



重刊荆川先生文集卷之二

詩

庚子歲海印寺再舉同年會紀事四首

此下係春坊時作

伐木張新燕攀鱗憶往時重來散花處更是聚星期
玉佩皆鵷侶金河即鳳池獨憐丘壑質還復接芳儀
淨院早涼生佳賓四座傾花間重識面塔裏舊題名
對酒憐萍跡聞歌想鹿鳴十年還此會那得更無情
故遊經繡陌初地入松扉可那看花伴年年漸覺稀
一鐘收宿雨雙樹帶餘暉若問龍池劫誰能不醉歸

梵宮鄰帝苑長此集儒紳檻外諸天界尊前四海人
星霜別後鬢花月向來春且共攄籌策雲臺早致身
得薛君所寄三游紀興刻中有楊方洲見懷之
作蓋別去已十餘年矣撫卷慨然用韻奉答
昔抗萬言疏還歸四壁居誼才應共惜黥黷更無如
顧爾猶巖壑慚予濫石渠
聖明思直諫早晚下徵書

送黃翠巖赴松江推官任

君本儒家子新詩更出奇自宜金馬署暫拜爽鳩司
海國收魚稻桑田賦繭絲南州饒土物勉爾一無私

送沈君守寧波

五馬去趨蹕孤城積水含地收蚶蛤稅人與龍蛇參
夷貢珠頻入僊書穴可探清貧君已慣海味不須甘
送陸舍人調遼府長史

十載紫薇郎長隨玉輦傍忽辭漢天子去謁諸侯王
夢渚陪游獵蘭臺佐羽觴子虛今在楚作賦有輝光
送王舍人往崑山爲顧相公營墓

明主敦耆老藏山借寵恩使臣出左掖秘器給東園
舊路吳中樹新碑海上原平津衆賓客試問幾人存
聞石屋彭君置生棺有感爲賦四詩

青山結淨因回首跡俱陳司馬四壁宅榮期百歲身
文犧幸知免行蟻待相親試料還真後誰爲倚戶人
隱几嗒然安疑君是鵷冠道書肘後繫人世鏡中看
家本無千橘生常卧一棺不因茲下淚任爾雍門彈
苦欲辭簪紱歸來掩故園無過六百石只對五千言
倚樹看蜩化逢人笑舌存老龍且莫去爲我發狂論
吾與爾皆夢相看一笑時拘拘亦何惡役役尚如斯
藂桂山中約枯槎海上期胡爲更羈縲有愧故人知
寺中訪後渠佳侍郎不遇次韻

爲訪高人館聯鑣出近垌並從金地入不見玉山形

榻尚留僊塵雲疑隔使星無人問奇字載酒只空亭
濟上別錢副使

木落村逾迥洲迴水更包亂泉春急峽短日淒寒郊
問俗非吾土逢君似舊交笑談方此始何事又相拋
點蒼山歌贈雪屏趙考功

點蒼山十九峯峯峯巧削玉芙蓉炎天赤日雪不融
峯頂湧出十九泉一峯一泉相縈纏流到峯前共一
川雪花亂落綠波裏疊島連洲鏡中起是爲巨海名
西洱蒙舍當年控百蠻山水中間鑿兩關一夫守此
百不攀聖代垂裳九夷附此地千秋罷烽戍洱海行

人日夜渡剪除蓬蒿疏街衢歌鍾綺衣盈路隅昔日
不毛今雄都山中雞犬散不取山下烏蠻種禾黍况
乃儒風似鄒魯紛紛犀象走王庭恠石亦具山水形
盡輦中州作畫屏羨君結廬山之窟窓裏諸峯互出
沒夜夜讀書常映雪十年簪笏繫朝班位高官要身
不閒惟有清夢到故山余亦平生好奇者一說名山
心若洒何時與君共坐雪峯下

李中麓文選藏書歌

中麓子最好奇平生苦心只自知破塚將尋姬氏籍
鑿山欲出禹王碑鳥篆蚪文焚後字白雲黃竹刪前

詩藏在陰厓及海窟神物守護誰得窺自從掇取歸
君屋但聞胡山鬼夜哭汗牛詎止盈五車挿駕應知
滿萬軸開函几席生雲烟五色紛紛耀人目家中綾
綺割截盡更剪朝衣作裝束中麓子幾歲讀書長閉
門自信中郎能一目還輕左氏識三墳邇來下筆作
詞賦絕似先年石鼓文却憶射策來京國此時才士
紛如雲雕龍白馬爭先後一日逢君皆閉口試問鼪
鼠君已知解對黃熊誰更有共看飛騰邁等倫早排
閭闔上麒麟遂令紈袴生嘆息公卿元是讀書人老
大無聞予自憐論交多愧十年前可道壯心猶未已

時復從君乞一編

詹府讌集奉和上宰松臯公三首

祥光虹渚應玄蒼
喜溢仙曹薦羽觴
七鬯萬年徵子聖
股肱一德見臣良
袖携香霧東華上
履曳星辰北斗旁
共說疑丞歸大老
競將禮樂贊靈昌

御苑先春萬木蒼
宮雲裊裊度瓊觴
鵷班並引金貂貴
鴻羽全收玉署良
分日傳經清禁裏
罷朝起草紫宸旁
恩波忝竊安能報
願祝千秋寶曆昌

玉津晴望鬱蒼蒼
環珮初臨試紫觴
並向鳳池開勝會
早從麟角識元良
衣冠迥出商巖上
雨露偏承幼

海旁自愧承華箴未就謬將彤管奉明昌

送王翰林浙江兵備副使

同時詞客不如君一劍還將靜海濱
雞舌舊從香署吏虎符新領伏波軍
帆檣萬里輸蛟織樓閣三秋吐蜃雲
自笑馮郎將白首欲從幕下策奇勲

送鄒東郭掌南院

最憐江左風流地慙作周南太史公
通籍總稱鸞掖吏分曹獨向鳳臺東
香携漢署沾新綬花近秦淮瞰故宮
此去談經門下客幾人相對坐春風

贈吳山人歸自京師

山人不解機心事早歲藏珍學鹿門住傍巖崖惟四
壁賦成金石幾千言偶遊卿相多懸榻歸去蓬蒿正
滿園京洛豈無知已在看君終是厭煩喧

贈許太宰

卿家勲貴似諸袁兩世三登八座尊接席貂蟬開甲
第成陰桃李在公門身延白屋頻推哺官借青宮獨
拜恩

天子行將問黃髮老臣何以贊嘉言

宿雙塔寺林東城羅念菴誤於郭外相尋不遇

有作見寄用韻奉答

謾向金門學隱淪，獨遊花院散涼氛。
諸天只在人間世，並馬誰尋野外雲。
白日金輪臨戶映，香街笙管隔牆分。
化城本是迷來路，莫訝幽人好避群。

次韻贈湯將軍

將軍故中山侯之孫也

將軍妙算古人同，料敵常如在目中。
缺騎連營寒映月，樓船跨海夜乘風。
玉門烽火今猶急，桂嶺珠璣久未通。
却笑封侯應有種，看君百戰立奇功。

自述

此下係後家居時作

祇爲抽簪早歸來，已四春本非食肉相。
猶是飯牛身負郭，無新業灌園有舊磯。
邊獨釣客隴上，偶耕人

相見一相笑吾今罷問津

宿游塘書懷二首

脉脉常多病
睢睢竟寡諧
鶯鳩知分量
稿木任形骸
虫語喧清夜
藤花媚小齋
逃虛何足嘆
心迹幸無乖
雨過草木好
夜來池館清
露虫疑燭影
風樹答書聲
似瓠甘無用
爲羶厭有名
且師河上叟
毋使慮營營

題陳渡莊

經時不到此
花落徧庭蕪
開館猶如客
憑軒忽喪吾
蝶飛看栩栩
鳥喚聽烏烏
便欲題丘壑
於今總姓愚

岳亭遇盜次韻

枕書覺已倦，挺劍忽相求。
驚起游仙夢，虛疑賈客舟。
齋糧十日少，載橐一身浮。
澹泊堪爲笑，將何謝爾偷。
病中試新茶

久不窺園圃，多應徧落花。
生涯只本草，歲月又新茶。
婚嫁身多債，詩書眼尚遮。
病來都忘却，恰似老僧伽。

泊舟郭外有感

時旱災甚

愁多番夜短，村郭又雞鳴。
更聽鄰舟語，行看海日生。
新秋河漢影，竟夕桔槔聲。
誰能訟風伯，一使甘霖傾。
同褚生滔徐生大復夜過城壕水榭作二首

出郭即山家，孤亭更水涯。
人開池上酌，蓮吐月中花。

清籟微微至明河漸漸斜坐疑塵世隔雞犬亦無譁
祇堪成獨往詎意得同群柳色秋將近烏啼夜欲分
細吟西澗草間誦北山文縱然逢醉尉不是故將軍
時居人有
詞問者

游永慶寺示諸友

村墟正三月春服領春風飛鳥機心外青天佛眼中
觀心猶是障齊物亦非同何處衆真訣顏生昔屢空
題金山寺付僧惠傑四首

何處尋龍藏停橈聽梵音中流一塔影遠樹萬家陰
僧定潮來去月明江淺深試將空水相堪比慧公心

隱隱帆檣外分明見法幢川光孤斷石井脉割寒江
折葦僧歸渡觀潮客倚窓一窺龍女偈坐使戰心降
憑虛聊騁望面面荻蘆秋坐據三生石心隨萬里流
鼃鼃爭出沒樓館定沉浮向夕烟氛斂珠光似可求
法界元無著寥寥空水雲鐘聲潮外住佛相鏡中分
經爲魚龍說人將鸛鶴群慈航如可借不厭往來勤
宿荆溪上塘菴述懷余向曾游此匆匆十年矣
園令還多病東方更少徒尋山只獨往到寺即吾廬
酬答慙居士衣冠謝鄙儒冥心偶有會木榻小跏趺
禪棲吾所好來往亦隨緣信宿還今夕支離又十年

病身寧禮束，懶性已書捐。興到成開口，逢人更默然。
海上倭方急，雲中虜又侵。纓冠本非分，抱膝復何心。
樹冷秋前寺，篁齊雨後林。此鄉非楚澤，濯足亦成吟。
委形堪落魄，任性絕安排。得失浮生夢，閒忙造物差。
平湖踈野樹，微雨寂山齋。欲證空王偈，猶嫌落幾階。
家園只百里，幾月不知歸。飯合山僧竈，眠分漁父磯。
貌衰非示病，才拙似忘機。雖然斷葷酒，不惹獨醒譏。
山房夜雨歇，簷溜響空堦。叔夜惟貪睡，榮趣又孰偕。
廢梳同祝髮，厭肉類持齋。轉覺人情隔，岩僧却可儕。

登常山山亭次壁間韻二首